


忠經

全

九ノ



忠經序

忠經者蓋出於孝經也仲尼說孝者所以事君

之義則知孝者俟忠而成之孝經云事親孝故忠可移於君又云

揚名顯親為孝之終所以答君親之恩明臣子

之分忠不可廢於國孝不可弛於家孝既有經

忠則猶闕故述仲尼之說作忠經焉弛音始○弛猶廢也

忠孝所以報答君親臣子分所當為者故有國

家者不可無忠臣孝子也聖人既有經以教孝

則忠不可偏闕也故述聖人之義而今皇上含

庖軒之姿韞勲華之德弼賢俾能無遠不舉忠

之與孝天下攸同今皇上指漢順帝也庖謂伏義一稱庖犧軒黃帝軒轅也

勲放勲華重華謂堯舜也含姿有其質也韞德齊其聖也弼賢任賢為相俾能使能任職也言君德明聖宰輔忠良賢能之臣雖遠必舉故忠孝之道大明天下皆同其化也臣融巖

野之臣性則愚朴沐浴德澤其可潛默作為此

經庶少裨補言臣本山巖村野之民沐浴潤澤

以作此經庶幾雖則辭理薄陋不足以稱焉然

忠之所存存於勸善勸善之大何以加於忠孝

者哉雖辭章義理淺薄俗陋不足稱述聖言夫

定高卑以章目引詩書以明綱臣師於古曷敢

徒然其或異同者變易之宜也言著經取君尊

著其標目引詩書之言以證其大綱非敢妄作徒為蓋師古聖孝經之義也其中略有異同者

斷章取宜文或
有變易之宜
或對之以象其意或遷之以就

其類或損之以簡其文或益之以備其事

所謂變易

者如孝經先明五孝此經聖君以至兆人孝經有諫諍感應此則有忠諫證應之類是對之象

意也孝經專明子道此則明臣道故有武備觀風為國揚聖辨忠諸目是遷之以就其類也凡

經所言皆聖人之意六經之文或損或以忠應益雖義有不同其要在於明忠而已

孝亦著為十有八章所以法其至公勉其至誠

信本為政之大體陳事君之要道始於立德終

於成功此忠經之義也

應對也君親雖曰不同忠孝本無二致公直忠

誠事君之至理也人臣之義始於立德德行充積則身立名揚而寵祿至忠之始也勞績茂著

則功成職盡而臣道昭忠之終也

大漢漢安元年春三月甲子臣融謹序

漢安元年壬午順帝

在位之十七年按傳馬融字季長扶風人仕至南郡太守作忠經十八章弟子大司農北海鄭玄註此經作於初仕之時

忠經解註序

忠經者漢南郡太守季長馬先生之所作也先生才高學博爲世通儒蓋以人生兩間參天地而爲三才者以其忠與孝也孝之一字在孔子與曾參子輿設於問答詳載一經分爲十有八章義備矣忠則雖雜見于經傳子氏之編第無全書季長先生生于漢安之世遠宗孔氏之學倣擬孝經而作忠經辭詳義備亦爲一十八章其扶世立教嘉惠後進何如惜乎述作之後世遠言湮子弟習讀但知孝經之所以爲孝而不

知忠經之所以爲忠深有昧乎前賢作經之旨
陽自蚤歲先君子授是經曰孝者忠之本忠者
孝之推二者宜並行而不可偏也陽謹習讀蓋
亦有年今既厠職蘇庠遇春官况候爲柱石大
臣之薦玉敕金章來守是邦凡其居官守職爲
國爲民之政莫非忠孝先焉爲詩曰報國一心
何日盡思親雙淚幾時乾惓惓盡已之誠與此
經若合符節由是繕寫一本奉爲覽觀侯即忻
然以謂有功名教之書鋟梓廣示來學仍命較
正以引其端於戲前賢之書非後賢之好古無

以傳後賢之學非前賢之垂教無以明何忠經之湮沒罕傳千有餘載而讀者尠也况侯以是為律身之本而欲開廣來學以為竭忠之助斯足以見聖朝作養忠蓋超越乎往代也遠矣世之學者從事孝經之餘沉潛忠經之旨而擴充之上焉而事天事君下焉而顯親保行使盡已之心莫不止于至善之地是經於世豈小補云

宣德甲寅冬十月初吉會稽韓陽序

忠經篇目

天地神明章第一

聖君章第二

冢臣章第三

百工章第四

守宰章第五

兆人章第六

政理章第七

武備章第八

觀風章第九

保孝行章第十

廣爲國章第十一

廣至理章第十二

揚聖章第十三

辨忠章第十四

忠諫章第十五

證應章第十六

報國章第十七

盡忠章第十八

忠經

王相箋註

昔在至理上下一德以徵

天休忠之道也

理治也上下君臣也徵明也驗也休美也祚也
言古聖王至治之時君臣同德上格於天則休
美嘉祥之氣應乎人

事乃至忠之道也

天之所覆地之所載人之
所履莫大乎忠

履行也人居天地覆載之間處君臣上下之際
履之則順而吉違之則逆而凶莫有大於忠者

忠者中也至公無私天無
私四時行地無私萬物生

人無私大亨貞忠也者一

其心之謂矣

忠者至中之道公而無私故天地至公而無私
則四時化育而萬物生成人能無私心守至中
之道則無往而不貞吉矣執忠
之道無他一其心而不易是也

為國之本何莫由忠忠能

固君臣安社稷感天地動
神明而況於人乎

忠也者立國之本也忠之爲效盡心事上則能
固結君臣竭力宣勞則能奠安社稷精誠純一
可感應於天地至公無私可昭鑑於神明況在
於人有不聞風而從化者乎

夫忠興於身著於家成於

國其行一焉是故一於其身忠之始也一於其家忠之中也一於其國忠之終也身一則百禄至家一則六親和國一則萬人理

興猶始也身與家國雖殊其忠則一始終猶次第也人之忠誠盡乎一身信孚於家而后能教成於國其要在精一而已故立身純一則福祿自至刑家無二則親戚悅睦治國無私則天下自化矣

書云惟精惟一允執厥中

書虞書大禹謨大舜戒禹之辭也引此以明至忠之理難明而易昧精以察之一以守之以至公無私之心常為之主自無有過不及之差常

執此中則天下治矣

右天地神明章第一

此章首明忠道之大

格於天地神明惟至公無私精一不易統全經之始終即開宗明義之意

惟君以聖德監於萬邦自

下至上各有尊也故王者

上事於天下事於地中事

於宗廟以臨於人則人化
之天下盡忠以奉上也

監視也臨莅也言聖君在上垂監於下萬邦在下觀行於上王者至重猶有所尊况其下者乎故王者以忠敬之心事天地宗廟以忠恕之道臨莅萬民則人皆化之能盡忠以事其上

是以競競戒慎日增其明

祿賢官能式敷大化惠澤
長久黎庶咸懷故得皇猷
丕丕行於四方揚於後代
以保社稷以先祖考蓋聖
君之忠也

競競恐懼也敷布也皇猷帝功也丕丕光大頌
言聖君之治天下夙夜戒懼是以增益聰明睿
智之心賢者祿之以彰其德能者官之以盡其
職布治化於四方行惠政於久遠故黎民咸懷
聖王之恩澤是以帝德光華茂著於天下永保
社稷於無窮此聖君之忠也

詩云昭事上帝聿懷多福

聿音兩

入聲

詩大雅大明之篇聿由此也懷來也此言文王之德引此以明先王昭其忠誠以事上帝由此以多福也

右聖君章第二

此章言聖君正己化民教天下以忠之義

爲臣事君忠之本也本立

而化成

忠者爲臣之本也根本既立而教化始成

家臣於君可謂一體下行

而上信故能成其忠

大臣君之股肱君者臣之元首元首股肱可謂一體矣必也大臣盡其職人君信其道君臣相

信然後能

成其忠

夫忠者豈惟奉君忘身殉

國忘家正色直辭臨難死

節而已

殉音旬
去聲

豈惟者不獨此也人臣奉君則忘其身以身殉國則忘其家立朝正色則直其言患難之臨則死其節皆忠之事也然此特爲一節之忠非冢臣之任也

在乎沉謀潛運正國安人

任賢以為理端委而自化
尊其君有天地之大日月
之明陰陽之和四時之信
聖德洋溢頌聲作焉

所謂冢臣者在乎沉靜其謀猷潛默其運用任
信賢才以協理端其委用而成化大臣之靜鎮

如此而聖君之端拱可知人君能得賢輔則君
道尊嚴如天化育如地昭融如日月之明調變
如陰陽之序不言而信如四時之代行則聖人
之德洋溢樂頌由此而作蓋大臣所以致君之
效也

書云元首明哉股肱良哉

庶事康哉

書虞書益稷篇元首君也股肱大臣也庶事朝

廷衆事康寧治也此臯陶賡舜之歌言人君精
明則股肱忠良而天下之庶事皆安治康寧也

右冢臣章第三

冢大也次天子者諸侯漢之諸侯有土而無民其賢者進用為

大臣故言冢臣以該諸侯也

有國之建百工惟才守位

謹常非忠之道

建國者非百工不能成庶績惟才是用國之常

經守位盡職百工

之常非所謂忠也

故君子之事上也入則獻
其謀出則行其政居則思
其道動則有儀秉職不回
言事無憚苟利社稷則不

顧其身上下用成故昭君
德蓋百工之忠也

君子雖在庶位其事上也公家之利知無不言
其出外也苟利於民政無不行居位則思益國
之道言動則有威儀之則秉執職事而不紆回
邪曲言事則無所忌憚苟利於社稷則不顧其
身家君任百工之能百工奉君之政政成於下
而德歸於上是爲百工之忠也

詩云靖共爾位好是正直

詩小雅小明之篇靖安也好愛也此周大夫勉其僚友之詩引此以明凡居百職之臣當安靜以供職事而好愛正直之人以輔助之也

右百工章第四

百工百職也卿大夫士庶司百官謂之百工舜歌曰股肱喜哉

元首起哉百工熙哉此之謂也

在官惟明莅事惟平立身

惟清清則無欲平則不曲
明能正俗三者備矣然後
可以理人

莅臨也言為守宰異要有三居官不明則事多
欺蔽莅事不平則民多怨尤持身不清則民心
不服惟清則心無所欲平則理事不曲明則化
民正俗三者俱備能理民盡職而無愧矣

君子盡其忠能以行其政
令而不理者未之聞也

三者既備又當盡其忠竭其能於以行政治民
無不理矣

夫人莫不欲安君子順而
安之莫不欲富君子教而

富之篤之以仁義以固其
心導之以禮樂以和其氣
宣君德以弘大其化明國
法以至於無刑視君之人
如觀乎子則人愛之如愛

其親

人民之性皆欲安平君子則為之撫輯綏定而
不擾是順而安之也莫不欲富君子則為之教
養生聚而不煩是教而富之也以仁義篤勸其
民而固其忠孝之心以禮樂導化其民而和其
忿戾之氣宣布君上之德以弘大其化昭明國
家之法致刑措之平所治人民君之民也吾視
之如子則民愛
守宰如父母矣

是故祗承君之法度行孝悌於其家服勤稼穡以供

王賦此兆人之忠也

祗音祈稼
穡音嫁色

祗敬也穀收成曰稼歛藏曰穡王賦王家之稅
賦也言為民者當奉敬君王之法度躬行孝悌
於家庭勤勞稼穡以供朝
廷之稅賦此兆民之忠也

書云一人元良萬邦以貞

書商書太甲下篇一人君也元大也良善也貞正也此伊尹訓太甲之辭引此以明一人者萬邦之儀表一人元良則萬邦臣民皆正矣

右兆人章第六

百萬曰兆兆人謂天下庶人也此書出唐監本舊本作兆民章

唐太宗諱民故改兆人可九經中以臨於人則人化之正國安人可

之人諸人字避

諱改作人字後章意同

夫化之以德理之上也則
人日遷善而不知施之以
政理之中也則人不得不
為善懲之以刑理之下也
則人畏而不敢為非也

言以德化民則民日遷於善而不知其所由故
為治理之上所謂道之以德也施行善政以勵
其民則民或勉而為善故次於德所謂道之以
政也臨以刑威則民恐懼而不敢犯未革其心
故為治理之下所謂齊之以刑也

刑則在省而中政則在簡
而能德則在博而久

省明察也簡要而不煩博廣也言君子未嘗無

刑惟省察而中度如舜誅四凶而萬國咸寧君
子為政在簡靜而通敏如仲弓居敬行簡以臨
其民施德於民在普博而悠久如文王親賢樂
利而民沒世不忘是也

德者為理之本也任政非
德則薄任刑非德則殘故
君子務於德修於政謹於

刑固其忠以明其信行之
匪懈何不理之人乎

殘害也匪懈不怠惰也言理治之道在德政刑
三者而德又三者之先理之本也任政非德則
薄而無恩任刑非德則殘而致亂是以君子惟
德是務修明庶政謹察刑法固守忠誠昭明信
義夙夜匪懈以治其
民焉有不治者乎

詩云敷政優優百禄是道

道音

酉

詩商頌長發之篇敷布也道聚也此頌成湯之
詩引此以明爲民上者敷布聖政優餘寬裕以
治其民而百禄咸

宜來聚其躬也

右政理章第七

此言君子理
民行政以忠
信爲本德爲
先政刑爲次

王者立武以威四方安萬
人也淳德布洽戎裔稟命
有文事者必有武備故王者立武臣董師旅以
威加海內伐叛討逆以備不虞以征不庭而安
萬民其要在於廣布醇厚之德洽于天下然後
四裔畏威懷德咸歸命于朝廷也

統軍之帥仁以懷之義以

厲之禮以訓之信以行之
賞以勸之刑以嚴之行此
六者謂之有利

武臣之任主於寧靜非專利於征伐也故統軍
之帥在馭衆而安人撫其疾苦人懷其仁勸其
忠義使人激勵明其禮教咸遵節制示之以信
使人不疑有功必賞而人敢勇有罪必誅法令

始行以此六者行
于師中無往不利

故得師盡其心竭其力致
其命是以攻之則克守之
則固武備之道也

將能行此六者故師旅之衆皆盡心竭力效死
以從之以之攻城必克守疆必固武備之道也

詩云赳赳武夫公侯干城

詩周南兔置之篇赳赳武貌干扞禦也此言文王之化引此以明王者御將得宜雖赳赳然兔置之武夫皆可以為公

侯之干城矣 置音嗟

右武備章第八

此章言將帥之任武臣之忠也

惟臣以天子之命出於四

方以觀風聽不可以不聽
視不可以不明聽則審於
事明則辨於理理辨則平
事審則分

使臣之行如君之耳目不聰不明不勝其任不
聰則惑其聞聽不審則不能分晰不明則蔽其

所見理不辨而不能平不

平不公則不忠於所事矣

君子去其私正其色不害

理以傷物不憚勢以舉任

惟善是與惟惡是除以之

而陟則有成以之而黜則

無怨夫如是則天下敬職

萬邦以寧

物民間生聚之物百姓因之以生者也舉任舉
官任事也陟進其位黜退其職言君子無私正
色以率下僚不因權勢所挾而妄舉其人惟賢
則舉惟惡則除是以舉官任職則有成功退黜
不肖則當其罪而無怨天下百官皆敬慎其職
事以理其民而萬方泰寧也

詩云載馳載驅周爰咨諏

諏音

鄰

詩小雅皇皇者華之篇君宴使臣之詩周徧也爰於也咨諏訪問也引此以明使臣承天子之命巡行郡國當周徧咨訪以知民間疾苦也

右觀風章第九

此言王臣代天子之命巡行四方以觀風俗

夫惟孝者必貴於忠忠苟
不行所率猶非其道

言行孝者不可無忠苟不由忠而行則雖孝猶
非也

是以忠不及之而失其守
匪惟危身辱及親也

爲臣不忠則失其守喪其身而辱其親矣

故君子行其孝必先以忠
竭其忠則福祿至矣

爲臣行孝必先盡其忠忠盡則福至而親榮矣

故得盡愛敬之心以養其
親施及於人此之謂保孝

行也

忠順不失以事其親德教加於百姓榮於父母
可謂保孝行矣

詩云孝子不匱永錫爾類

詩大雅既醉之篇匱竭也類善也此周大夫燕
而頌君之辭引此以明孝子之孝能盡忠誠而
不竭則永錫
爾以善矣

右保孝行章第十

此言君子盡忠而不辱其親乃所以保孝

行也

明主之爲國也任於正去
於邪邪則不忠忠則必正
有正然後用其能

言人主能任忠正而去其邪僻則不忠者遠矣

蓋邪僻之臣或有一事之能人君愛其能必爲其所惑矣故必有正臣然後用其能

是故師保道德股肱賢良
內睦以文外威以武被服
禮樂隄防刑政

師保國之元老非道德不居股肱君之輔弼非賢良不任文以睦內治武以威外敵禮樂如衣

服之在身而不可去刑政如冰之隄防恐其潰
溢而害民

故得大化興行蠻裔率服
人臣和悅邦國平康此君
能任臣下忠上信之所致
也

言德化行而遠近悅服天下治平皆由君能信任忠臣之效也

詩云濟濟多士文王以寧

詩大雅文王之篇義取賢材之衆邦國安寧也

右廣爲國章第十一

此章言人君任正去

邪以用忠能之義也

古者聖人以天下之耳目

爲視聽天下之心爲心端
旒而自化居成而不有斯

可謂至理也已矣

流

旒音

旒冠上贅旒也言古之聖人能任賢臣以爲耳目故聰明睿知無所不照以天下人民之所欲爲心故萬民悅服恭己無爲而天下化成聖德謙冲而不自居其功可謂至治矣

王者思於至理其遠乎哉
無爲而天下自清不疑而
天下自信不私而天下自
公賤珍則人去貪黷侈則
人從儉用實則人不僞崇

讓則人不爭故得人心和
平天下淳質樂其生保其
壽優游聖德以爲自然之
至也

人君欲天下至理豈遠而不可致也其要在恭
已無爲以任忠賢則天下清任賢不疑則天下

信至平無私而天下公不貴珍寶則人不貪不
尚奢侈則人自儉誠實待人而人不欺崇尚禮
讓而人不爭如是則人和世平天下淳厚質朴
樂其天和民無夭折聖化洋溢同於天地自然
而然德之至也

詩云不識不知順帝之則

詩大雅皇矣篇帝天也則法也言文王不自任
其聰明知識惟順天以為法任賢尚德而天下
自化也

右廣至理章第十二

此章
推廣
政理
之義

君德聖明忠臣以榮君德

不足忠臣以辱

君聖則臣喜其際遇以為榮君德未修則臣耻
不能正君以為辱

不足則補之聖明則揚之

古之道也

君德不足則補君之失而匡救其惡君德聖明則宣揚其善而將順其美

是以虞舜有德則咎繇歌

之文王之道周公頌之宣

王中興吉甫咏之

咎繇音高遙

即古臯陶字

言舜有聖德皋陶賡歌以揚之周公作頌以美
文王尹吉甫作詩以美宣王皆臣子揚君之德
也

故君子臣於聖明之時必
揚其盛德流滿天下傳於
後代其忠矣夫

君有聖德而不揚非忠也

右揚聖章第十三

此章言大臣能揚聖主之德

大哉忠之爲用也施之於
邇則可以保家邦施之於
遠可以極天地故明王爲
國必先辨忠君子之言忠

而不佞小人之言佞而似
忠而非聞之者鮮不惑矣

鮮上

聲

言古明王欲治其國必先辨察忠邪君子言直
而不佞小人便佞取悅於人所謂大奸似忠大
詐似信苟非聖君
鮮不為其所惑

夫忠而能仁則國德彰忠
而能知則國政舉忠而能
勇則國難清故雖有其能
必由忠而成也

夫忠臣有仁則能彰明主德有知則能修明國
政有勇則能肅清國難雖有仁知勇三者之能

必由忠而後

能成其功也

仁而不忠則私其恩知而

不忠則文其詐勇而不忠

則易其亂此三者不可不

辨也

文去聲

文偽飾也苟不以忠則仁必姑息私恩以植其
黨知必巧偽以飾其奸勇必剗復以成其亂不
忠之人雖有三者適足以悞國不可不辨也音復
僻

書云旌別淑慝其是謂乎

慝音

或

書周書畢命篇成王命畢公之辭旌表也別異
而懲之也淑善慝惡也引此以明王者明察忠

邪而旌善懲惡也

右辨忠章第十四

此言明王能辨忠佞之臣

忠臣之事君也莫先於諫
下能言之上能聽之則王
道光矣

君有過臣不可以不諫下能言而上能聽則君

德彰而王道光矣

諫於未形者上也諫於已
彰者次也諫於旣行者下
也違而不諫則非忠臣

君之過未形而先諫爲上已彰而未行諫止者
次之已行而匡正者爲下皆不失爲忠若違道
而從君之惡則非忠臣也

夫諫始於順辭中於抗議
終於死節以成君休以寧

社稷

諫諍之道始於委婉開導其君之心繼之以抗
言敢諫抗議不從則繼之以死務使其君改過
以成君
之美也

書云木從繩則正后從諫
則聖

書商書說命中篇繩墨也后君也傳說誠高宗
之辭言木雖邪能從匠之繩墨則正矣君雖有
過能從臣之
規諫則聖矣

右忠諫章第十五

此章
專言
諫諍
之義

惟天監人善惡必應善善莫
大於忠惡莫大於不忠忠
則福祿至焉不忠則刑罰
加焉

惟臣盡忠盡其職之所當盡故爲臣之道莫大
於忠能盡其忠則福祿攸歸苟或不忠於君則

刑罰必至是善惡之道上監於天而感應之速也

君子守道所以長守其休
小人不常所以自陷其咎
休咎之徵也不亦明哉

休美福也咎灾禍也君子盡忠則致休美小人
不忠則干刑咎則休咎之應理至明也

書云作善降之百祥作不

善降之百殃

書商書伊訓篇伊尹訓太甲之辭引此以明作
善則天降百祥不善則降百殃所以勸忠也

右證應章第十六

證徵也徵
與禎同音
宋仁宗諱
禎徵字改

證故宋本唐書魏徵
作魏證此章云休咎
之徵是明本經文已
改正章名猶未改也

爲人臣者官於君先後光
慶皆君之德不思報國豈
忠也哉

言爲官受祿於君榮親蔭子皆君之恩受恩不
報非忠也

君子有無祿而益君無有

祿而已者也

君子在庶人不食君祿常思有益於君况有位者乎

報國之道有四一曰貢賢
二曰獻猷三曰立功四曰
興利賢者國之幹猷者國

之規功者國之將利者國
之用是皆報國之道惟其
能而行之

賢材國之楨幹故進賢爲首獻其謀猷爲國之
規度次之爲國立功可以爲三軍將帥興利以
生國之財用爲人臣者各因其能而行之皆所
以報國也

詩云無德不酬無言不報
况忠臣之於國乎

詩大雅抑之篇衛武公自警之詞言人有德於
我則無不酬之有善言於我無不報之以人君
之貴尚酬德而報言

况忠臣之於國乎

右報國章第十七

此言
人臣
報國
之義

天下盡忠淳化行也君子
盡忠則盡其心小人盡忠
則盡其力盡力者則止其
身盡心者則洪於遠

天下之人皆盡其忠於國則淳厚之化大行有
位之君子爲國盡忠無位之小人爲國盡力盡

力者一身而已盡

心則洪大而悠遠

故明王之理也務在任賢

賢臣盡忠則君德廣矣

明王之理天下務在進賢賢臣爲國則仁政興
行規模洪遠君德廣被於天下也

政教以之而美禮樂以之

而興刑法以之而清仁惠

以之而布

賢臣盡忠則善政善教因之而美典禮樂頌由
之以興刑罰法度整肅而清明仁恩惠澤覃敷
而廣

布

四海之內有太平音嘉祥

既成告於上下播於雅頌


傳於無窮

夫如是則四海之內咸樂太平嘉祥瑞應畢集
於朝廷布告休美之徵應於天地宗廟萬國臣
民無不欣觀喜舞以慶熙皞之治聖德洋洋播
於雅頌傳之萬世諷咏無疆也


右盡忠章第十八

此章明
盡忠之
義以終
篇

忠經終









經忠